

Powšitkowne WOZJEWJENJA

njedźelu, 17. meje 2020

Wusyłanje Božemu službow live

Serbskorěčnu Božu mšu tutu njedźelu, 17. meje, móža wěriwi znowa jako livestream w interneće scěhować. Dopoldnja we 8.30 hodź. přenjese so wona z Kulowskeje cyrkwe. Tak budže to hač do swjatkwoniki, 31. meje, kóždu njedźelu, tež přichodny štwórtk, 21. meje, na swjedženju Božeho spěca. Z Ralbic wusyła so Boža mša njedźelu tohorunja we 8.30 hodź. přez livestream, ale jeniče za sluchanje. Linki k wusyłanjam su stajnje aktualnje na internetowej stronje www.posol.de podate.

Mejski nyšpor TCM

Towarstwo Cyrila a Metoda z.t. (TCM) přeprošuje na mejski nyšpor, kotryž budže njedźelu, 24. meje, w 17 hodź. w Róžeńčanskej swjatnicy a kotryž budže hudźbnje wobrubjeny. Zwuk přenjese so tež zwonka Božeho domu, hdžež budu přidatne městna k sedženju přihotowane, dokelž su městna koronoweje krizy dla w cyrkwi wobmjezowane.

Wustajeńca wo jutrach w Serbach

Nałožki, kotrež so wokoło jutrow w Hornjej a Delnej Łužicy, w katolskich kaž tež ewangelskich kónčinach pěstuja, předstaja wustajeńca „Jutry w Serbach“ w Budyskim Serbskim muzeju. Ju wobohaćeja twórby serbskeho wumělca Marija Ošiki, na přikład „Křižowy puć“. Wosebita wustajeńca wostanje hač do 23. awgusta přistupna.

Pytaja hladanskeho nawodu

Hornjołužiski zwjazk Carity z.t. pyta za swoju socialnu staciju Budyšin-Kamjenc noweho hladanskeho nawodu. Tale stacija zastaruje z třomi decentralnymi teamami něhdže 400 pacientow. Dokładne wupisanje je pod www.posol.de wozjewjene.

Póstny wopor młodžiny

Dekanatna młodžina móže swój póstny wopor hišće hač do njedźele, 17. meje, wotdać abo na konto Bistum Dresden-Meißen, IBAN, DE65 7509 0300 0008 2948 79, pod hesłom „Póstny wopor 2020“ přepokazać.

Telefoniske poradźowanje

Hornjołužiski zwjazk Carity z.t. poskičuje w koronowej krizy telefoniske poradźowanje, ale tež prosće rozmołwy z tymi, kiž maja žadosć za tym, z někim so rozmołwjeć móc. Sobudźělačarjo Carity su wot pónđzele do pjatka wot 8 do 16 hodź. pod telefonowym čisłom (0 35 91) 49 82 20, ale tež pod mailowej adresu beratung@caritas-oberlausitz.de docpějomi.